

Erich Bolinius
www.erichbolinius.de

(Bericht über den BSV Kickers Emden

Sendung „Flutlicht“ auf Radio Ostfriesland

Donnerstag, 27.2.2014 18.00 Uhr auf 94.0 bzw. 87,7)

Moin, leev Toehörers,
vandaag, so hebb ik lövt, kunn ik ennelk weer van 'n Punktspöl van Kickers Emden tegen de TSV Oldenburg vertellen. Man nix d`van. De Ollenburgers hebben dat Spöl ofseggt, umdat de Stadt Ollenburg de Platz speert harr. So wurr dat Kickers Emden mitdeelt. In Emden löven de Fans aber, dat de Mannskupp van Ollenburg 'n paar Spölers neet an disse Sönnndag an Boord harren. Worum ok immer, dat is spietelk, dat Kickers in dit Jahr noch keen Punktspöl maakt hett. Un so steiht man mit 17 Spölen wiet unner in de Tabell – een Stee vör 'n Ofstiegsplatz. Disse Plätzen worden ja upstünns ok van de oostfreeske Mannskuppen Germania Leer, TuS Pesem (Pewsum) un TV Bunn (Bunde) innahmen. Germania Leer hett lesd Wekenenn ok neet spölt, Pesem hett in Rothenfelde verloren un, dat is ja bold neet toe löven, Bunn, de dat hele Saison noch keen Spöl wunnen hett, winnt tegen de 2. Mannskupp van VfB Oldenburg buten mit 6:2. Dor hett sük de Trainerwessel al betahlt maakt, meen ik.

Kickers Emden hett na dat ofseggte Spöl in Ollenburg dat Beste ut maakt un hett Maandagabend noch Fründskuppspöl tegen de TuS Esens in Timmel dörföhrt. Harr Kickers noch vör eenige Tied in Esens dat Spöl mit 0:1 verloren, so wunn Kickers dit maal dat Spöl klaar mit 4:1 Toren. In Timmel overnahm Kickers sofort dat Kommando un föhrte na 'n Ecke dör 'n Tor van **Andreas Fleßner** mit 1:0. Na 'n moi Kombination kunn **Bernd Grotluschen** noch vör de Paus dat tweed Tor för Kickers sketen. Kört na de Pausentee kunn Esens dör Jannik Barfs up 1:2 verkörten. Dat Spöl wurr nu 'n bietje opener. Man an Enn van dat Spöl sörgten **Tido Steffens** un **Thilko Boekhoff** mit hör Toren för de Endstand van 4:1. Bi Kickers spölte na 'n lang Tied de verletzte Reinhard Grotluschen ok 'n kört Sett weer mit.

Sönnndag um Klock dree spölt Kickers Emden in dat Oostfrieslandstadion tegen de TuS Emstekerfeld. De stahn in de Tabell mit 23 Punkten een Platz over Kickers Emden, de bither 22 Punkten haalt hebben, de hebben aber al dree Spölen mehr maakt. Uppassen mutt de Achtermannskupp van Kickers Emden Sönnndag up de Spöler **Dustin Beer**, de al 10 Toren skoten hett. Aber ik bün mi seker, dat Kickers Emden dit wichtige Spöl klaar winnt. Ik tipp dorum 3:1 för Kickers. Hopentlik komen Bült Toekiekers in 't Stadion un fören de Mannskupp düchtig an.

So toe Schluss, so as immer, noch 'n kört Foetballsprök van de Spöler van Energie Cottbus **Mo Idrissou**: „Elk maakt, wat he will, un dat al de hele Week over. Wi sünd eenfach blot dumm, de dummste Mannskupp in de 2. Liga“. Ja, dat see he na dat lesd verlorene Spöl. Dor mutt wall wat dranwesen, Cottbus steiht an de lesd Stee in de 2. Liga.

Och, un noch eens, dat fraag ik hier maal in 't Studio. Well is egentlik för de homepage van Kickers Emden toeständig? Bit güstern Abend was dor de lesd Spöldag noch neet indragen. Ik segg immer weer, wenn man 'n egen homepage in 't Internet hett, dann mutt man de ok plegen.

So, leev Toehörers van Radio Oostfriesland,
ik hoop, Joe hett dat Plattdüütsk gefallen, denn mien Motto heet ja alltied,
plattdüütsk dürt - nettso as Kickers Emden – neet unnergahn.
Bit anner Maal

Joe
Erich Bolinius ut Emden-Petjem.

.